

Geleende Vere

Uittreksel van Pastoor Nesor se preek: B1434

Skriflesing uit 1 Sam.17:1- 58

Kernvers: 39 – ‘En Dawid het sy swaard bo-oor sy klere vasgegorde, en toe hy moeite doen om te loop, omdat hy dit nooit probeer het nie, sê Dawid vir Saul: Ek kan nie hierin loop nie, want ek het dit nooit probeer nie. En Dawid het dit uitgetrek.’

Die verhaal gaan oor Israel en die Filistyne wat teenoor mekaar in slagorde opgestel was vir oorlog, en hoedat Goliat hul held was. ‘n Reus van by die elf voet lank wat daar op en af geloop het om vir Israel uit te tart en uitgedaag om iemand te stuur wat teen hom wou veg. Daar was niemand nie.

Dawid het vir sy broers kos geneem en moes na hul welstand verneem in opdrag van sy vader Isai. Toe hy hoor hoedat hierdie onbesnede Filistyn die slagordes van die Here uittart het dit hom woedend gemaak en hy het uitgevra na hom. Sy broers was geïrriteerd met Dawid en toe gaan hy na koning Saul en sê dat hy teen Goliat sou veg. Saul wou dit nie toelaat nie omdat hy ‘nseun was, maar Dawid het vir hom vertel hoedat die Here hom gehelp het om bere en leeus dood te maak wat sy pa se skape wou verskeur en gesê dat die Here hom so sou help om hierdie Filistyn van kant te maak.

Saul wou toe hê dat Dawid sy wapenrusting moes dra maar toe Dawid dit aantrek kon hy skaars daarmee loop en het dit uitgetrek en gesê: ‘Ek kan nie, want ek het dit nooit probeer nie’. Met sy slingervel en vyf klippies en in die Naam van die Here het hy die reus trotseer en vir Goliat gesê: ‘Jy kom na my met ‘n swaard en met ‘n spies en ‘n lans, maar ek kom na jou in die Naam van die Here van die leërskaer, die God van die slagordes van Israel, wat jy uitgedaag het’. En Dawid het hom verslaan.

Kom ons kyk na die reuse wat ons vandag in die gesig staar: Reuse van geweld, van vrees en misleiding, korrupsie, werkloosheid, misdaad en morele verval om maar net ‘n paar te noem. Dit gries ons ook maar ons het ‘n aanraking van God nodig om hulle die hoof te bied...hier sal dit ook nie vir ons help om met ‘geleende vere’ die stryd aan te durf nie. Alleenlik ‘n persoonlike verhouding en wandel met die lewende God...en waar ons Hom leer ken het in die spervuur van die lewe.